

Edisi Januari - Jun 2025

MITASA



Suara

MITASA

*Adab Sebagai Asas
Kecemerlangan Akademik
dan Pembentukan Sahsiyah*

*Biar Wasiat Jadi
Suara Terakhir*

*Merungkai Potensi:
Prestasi Pekerja Dalam
Era Kerja Jarak Jauh*

*Motivasi Diri Berdasarkan
Penilaian Prestasi*

*Cabaran dan Keperluan
Graduan Teknologi
Maklumat Dalam Dunia
Pekerjaan Masa Kini*

*"Selamat Ke Kita Ni?":
Meneroka 'OSH'*

*Kursus Pengurusan Operasi
Perkhidmatan - Membentuk
Insan Adabi Cemerlang*



PERJUANGAN YANG BERTERUSAN

Pengalaman penulis sebagai penemuduga untuk program Ijazah undang-undang di Fakulti Undang-Undang UiTM Shah Alam setelah beberapa lama tidak berbuat demikian adalah amat memeranjatkan. Didapati, majoriti pelajar yang hadir untuk ditemuduga tidak bersedia daripada segi ilmiah untuk menghadapi temuduga tersebut. Dalam kelompok yang ditemuduga itu, majoriti calon-calon adalah pelajar daripada diploma UiTM sendiri. Masing-masing daripada pelbagai fakulti. Setiap kursus di UiTM sememangnya mempunyai sekurang-kurangnya satu mata pelajaran undang-undang yang berkaitan.

Selepas proses 'ice breaking', setiap calon tersebut diminta memilih dan seterusnya menjelaskan tentang subjek undang-undang mereka telah belajar. 95 peratus daripada mereka tidak dapat menjawab dengan baik atau betul. Adakah mereka merasakan berpakaian seperti seorang peguam sudah cukup untuk menyakinkan penemuduga untuk menerima mereka sebagai pelajar undang-undang? Atau mereka merasakan berhak atau 'entitled' untuk mendapat tempat kerana mereka adalah pelajar program diploma daripada UiTM juga?

Menghadiri temuduga untuk kursus ijazah di universiti adalah peristiwa penting bagi pelajar yang beralih dari pendidikan menengah, kajian asas, atau program diploma. Temuduga ini berfungsi sebagai platform bagi panel kemasukan universiti menilai kesediaan, semangat, dan kesesuaian calon untuk kursus yang digunakan. Oleh itu, penyediaan dan pemahaman menyeluruh mengenai cabaran yang akan datang adalah penting untuk berjaya melepasi saringan ini.

Persediaan adalah asas utama kepada kejayaan temu duga. Pelajar mesti melengkapkan diri dengan kemahiran dan pengetahuan yang diperlukan untuk menampilkan diri dengan yakin dan berkesan. Langkah-langkah utama termasuk:

Menyusun dokumen penting dengan kemas

Adalah amat penting bagi pelajar untuk menyediakan semua dokumen yang berkaitan seperti sijil akademik, transkrip, surat pengesyoran, dan resume yang tersusun dengan baik. Ia mencerminkan sikap pelajar. Susun dalam fail yang mempunyai folder supaya mudah diselak dan dibaca. Susunan mesti daripada yang terkini dahulu. Sijil-sijil perlu disusun mengikut keutamaan untuk membantu meyakinkan penemuduga bahawa pelajar sesuai untuk program yang diminta. Dokumen yang hilang atau tidak lengkap boleh mengganggu proses temuduga serta memberi tanggapan bahawa pelajar tidak serius atau betul-betul berminat dengan program tersebut.

Memahami kursus dan universiti pilihan

Pemahaman mendalam tentang kursus ijazah yang dipohon adalah penting. Ini termasuk pengetahuan tentang struktur kursus, subjek teras, prospek kerjaya, dan kaitannya dengan industri. Pelajar juga perlu tahu perkara-perkara asas mengenai universiti serta fakulti tersebut seperti nama penuh naib canselor, nama penuh dekan fakulti (berserta gelaran akademik atau gelaran kehormat masing-masing) dan yang seumpamanya. Calon yang berpengetahuan baik akan cenderung untuk meninggalkan kesan positif kepada penemuduga.

Membangunkan kemahiran komunikasi berkesan

Komunikasi yang baik adalah penting semasa temuduga. Pelajar harus berlatih menyatakan pendapat dan fakta dengan jelas dan yakin. Ini termasuklah menjawab soalan teknikal, isu semasa, membincangkan motivasi dan menerangkan matlamat kerjaya masa depan.

Persediaan dan Cabaran Pelajar Lulusan SPM, Asasi, dan Diploma dalam Temuduga Ijazah

Atifah Othman

Pensyarah Kanan Pusat Asasi



Menonjolkan imej yang profesional

Penampilan semasa temuduga universiti amat penting. Berpakaian yang sesuai, mengekalkan postur yang baik dan menunjukkan bahasa badan yang hormat boleh memberi kesan yang ketara kepada persepsi panel. Adalah lebih selamat untuk memilih warna pakaian yang mendamaikan serta biasanya digemari ramai atau mengikut kursus yang diminta. Contohnya, untuk ijazah undang-undang warna hitam, putih, biru gelap atau kelabu gelap adalah warna-warna yang biasa dipakai oleh pengamal undang-undang. Untuk pelajar perempuan, perlu memakai kasut bertutup yang berwarna gelap. Pelajar lelaki perlu memakai stokin yang formal. Ini bukanlah masa untuk membuat 'fashion statement' kecuali bidang yang anda pohon itu adalah bidang seni yang memerlukan kreativiti.

Cara menjawab yang tidak beremosi dan ilmiah juga penting apabila menjawab soalan-soalan yang berbentuk isu semasa. Elakkan jawapan yang berasaskan perbincangan netizen dalam media sosial semata-mata.



THE
STARTING
POINT
OF ALL
ACHIEVEMENT
IS

DESIRE.

- Napoleon Hill